

## ეთიკისა და ქცევის წესები და მათ დარღვევებზე რეაგირების პროცედურები

### მუხლი 9. ეთიკის კოდექსი

1. ეთიკის კოდექსი ეყრდნობა სამართლიანობის, ხალხის პატივისცემის, პირადი პასუხისმგებლობის პრინციპებს და გულისხმობს:

- საქართველოს კონსტიტუციით გარანტირებული და საყოველთაოდ აღიარებული ადამიანის უფლებების და თავისუფლებების აღიარებასა და დაცვას, საქართველოს კანონმდებლობით დადგენილი ნორმების შესრულებას;
- ნებისმიერი სახით დისკრიმინაციის დაუშვებლობის აღიარებას;
- აკადემიური თავისუფლების აღიარებას და აკადემიური კეთილსინდისიერების სტანდარტების დაცვას;
- ყველა სტუდენტისთვის/პროფესიული სტუდენტისთვის/მსმენელისთვის თავისუფალ გარემოში თანასწორ პირობებში განათლების მიღების უფლების აღიარებას;
- დასაქმებული პირისთვის თავისუფალ გარემოში თანასწორ პირობებში სამუშაოს შესრულების უფლების აღიარებას;
- პიროვნების კანონიერი ინტერესების, ინტელექტუალური საკუთრების, გამოგონებების და საავტორო უფლებების დაცვას;
- ურთიერთპატივისცემის, კეთილსინდისიერების, ნდობის, სამართლიანობის და პასუხისმგებლობის პრინციპების აღიარებას.
- საქმიანობის სამართლიანობის, საჯაროობის და ობიექტურობის პრინციპების აღიარებას და დაცვას.

2. ბნსუ-ს თანასაზოგადოება (ბნსუ-ში ყველა დასაქმებული პირი, სტუდენტები და პროფესიული სტუდენტები/მსმენელები) აღიარებს, რომ:

- მიისწრაფის შექმნას და შეინარჩუნოს ურთიერთნდობის გარემო, რომლის გარეშე წარმოდგენილია იდეების თავისუფალი გაცვლა, შემოქმედება და პიროვნების განვითარება;
- ურთიერთობების და საქმიანობის საფუძველია სამართლიანობის, სოლიდარობის, ურთიერთ-პატივისცემის, ერთმანეთის საგანმანათლებლო, კვლევითი, შემეცნებითი, შემოქმედებითი საქმიანობის და მისი შედეგებისადმი პატივისცემის პრინციპები;
- მისთვის მიუღებელია: ეთიკის კოდექსის, აკადემიური ეთიკის კოდექსის, ქცევის და ინფრასტრუქტურით სარგებლობის წესების დარღვევა; აკადემიური თავისუფლების, საგანმანათლებლო, სამეცნიერო, კვლევითი, შემოქმედებითი, შემეცნებითი საქმიანობის უფლების რეალიზებაზე და კრიტიკაზე ან საჩივრარზე პასუხის და/ან განმარტების გაცემის შესაძლებლობის დაუსაბუთებელი შეზღუდვების დაწესება; ბნსუ-ში ადმინისტრაციული და აკადემიური გადაწყვეტილების მიღების და სწავლა-სწავლებისას დისკრიმინაცია ასაკის, რასის/კანის ფერის, ეთნიკური კუთვნილების, სქესის, სექსუალური ორიენტაციის, რელიგიური ან სხვა შეხედულებების, სპეციალური საჭიროებების ან სხვ. ნიშნით; ბნსუ-ში პოლიტიკური თუ რელიგიური პარტიების/საზოგადოებების ორგანიზება; სხვისი აზრისადმი მიუღებლობის ან უპატივცემლობის გამოხატვა, შეურაცხმყოფელი გამონათქვამების გამოცემა ან მსგავსი ქმედების ჩადენა; პირადი ანტიპათიის გამოხატვა ან უთანხმოებების გამო კონფლიქტური სიტუაციის შექმნა.

3. ეთიკის კოდექსი ვრცელდება ბნსუ-ში საქმებულ პირებზე, სტუდენტებზე, პროფესიულ სტუდენტებზე/მსმენელებზე, წარმოადგენს ბნსუ-ში მოქმედი ქცევის წესების საფუძველს, მას უნდა შეესაბამებოდეს ბნსუ-ში მოქმედი სტანდარტები, წესები, პრაქტიკები;

4. ეთიკის კოდექსის პრინციპების დარღვევისთვის დადგენილი დისციპლინური საწესდებო მითითებულობა წინამდებარე შინაგანაწესში (დისციპლინური სახდელის საქმისწარმოებასთან დაკავშირებულ შესაბამის მუხლებში).

**ამონარიდი - შინაგანაწესი, დანართი № 02 – No01-01; 03.01.2023**  
**„აკადემიური ეთიკის კოდექსი, პრინციპები და სტანდარტები“**

**მუხლი 1. აკადემიური ეთიკის კოდექსი**

აკადემიური ეთიკის კოდექსი ეყრდნობა ბნსუ-ს ეთიკის კოდექსის პრინციპებს, ვრცელდება ბნსუ-ს აკადემიური თანასაზოგადოების ყველა წევრზე და წარმოადგენს ერთობლიობას იმ პრინციპებისა და სტანდარტების, რომლებიც მოქმედებენ ბნსუ-ში სწავლა-სწავლების, კვლევის და სხვ. პერიოდში და რომელთა დაცვა სავალდებულოა.

**მუხლი 2. აკადემიური თავისუფლების პრინციპი**

1. ბნსუ აღიარებს აკადემიური თავისუფლების პრინციპს - აკადემიური და სამეცნიერო პერსონალის და სტუდენტების უფლებას დამოუკიდებლად განახორციელონ სწავლა-სწავლება და კვლევა, ბნსუ-ს მართვის სუბიექტების მხრიდან ზეწოლის გარეშე განსაზღვრონ კვლევის ობიექტი, კონტროლისა და ცენზურის გარეშე გამოაქვეყნონ თავიანთი კვლევითი, შემეცნებითი და პრაქტიკული სამუშაოს შედეგები, კორექტულ ფორმაში თავისუფლად გამოხატონ საკუთარი აზრი და დამოკიდებულება. აკადემიური საზოგადოება ხელმძღვანელობს აკადემიური თავისუფლების და ინტელექტუალური პატიოსნების პრინციპებით, იზიარებს აკადემიური კეთილსინდისიერების, კულტურის დაცვისა და მხარდაჭერის პასუხისმგებლობას.

**მუხლი 3. პედაგოგიური საქმიანობის ეთიკის სტანდარტი**

1. ბნსუ-ში პედაგოგიურ საქმიანობაში ჩართული ყველა პირი აღიარებს, რომ საგანმანათლებლო პროგრამის განმახორციელებელსა და სტუდენტს/პროფესიულ სტუდენტს შორის ურთიერთობები ეფუძნება აკადემიური თანამშრომლობის, სამართლიანობის და გამჭვირვალების პრინციპებს, და მას დაუშვებლად მიაჩნია:

- სტუდენტთან/პროფესიულ სტუდენტებთან ისეთი ურთიერთობების დამყარება/დამყარების მცდელობა, რომლებიც სცდება საგანმანათლებლო, კვლევითი ან აკადემიური ურთიერთობების დადგენილ ფორმებს და ჩარჩოებს;
- სტუდენტისაგან/პროფესიული სტუდენტისაგან პირდაპირი ან ირიბი გზით ნებისმიერი ფინანსური ან მატერიალური სარგებლის ან/და მომსახურების მიღება ან/და ასეთი სარგებლის/მომსახურების პირდაპირი ან ირიბი მოთხოვნა;
- პროტექციონიზმი და სტუდენტის/პროფესიული სტუდენტის მიმართ ისეთი დამოკიდებულება, რომელიც სტუდენტს/პროფესიულ სტუდენტს აყენებს პრივილეგიურ მდგომარეობაში ან ექვემდებარება მისი შეფასების ობიექტურობას.

2. საგანმანათლებლო პროგრამის განმახორციელებელი ვალდებულია:

- უზრუნველყოს ხარისხიანი განათლების მიღების და სასწავლო პროცესში ყველა სტუდენტის/პროფესიული სტუდენტის თანაბარი ჩართულობის შესაძლებლობა;
- სტუდენტის/პროფესიული სტუდენტის ცოდნა და უნარები შეაფასოს კეთილსინდისიერად და სამართლიანად, გამოიყენოს შეფასების განჭვირვალე კრიტერიუმები, რომლებიც დადგენილია პროგრამის კონკრეტული კომპონენტისთვის;
- რეაგირება მოახდინოს დარღვევის ისეთ ფაქტებზე, როგორცაა პლაგიატი, ინფორმაციის გაყალბება, ფალსიფიცირება, მანიპულირება, შეფასებების შედეგების გაყალბება, გადაწერა, სხვის ნაცვლად ნაშრომის/დავალების შესრულება და/ან ამის სანაცვლოდ პირდაპირი ან ირიბი გზით რაიმე სახის ფინანსური ან მატერიალური სარგებლის ან/და მომსახურების მიღება;
- შექმნას ყველა აუცილებელი პირობა სპეციალური საგანმანათლებლო საჭიროების მქონე სტუდენტის/პროფესიული სტუდენტის მიერ დავალების შესრულებისა და კომპეტენციების დემონსტრირებისთვის;
- არ მოთხოვოს სტუდენტს/პროფესიულ სტუდენტს მისი პერსონალური მონაცემების გასაჯაროება, დაიცვას სტუდენტის/პროფესიული სტუდენტის პერსონალური მონაცემების და პირადი ინფორმაციის კონფიდენციალურობა.

3. ბნსუ-ში პირადი მონაცემების და ინფორმაციის კონფიდენციალურობის პრინციპი გულისხმობს:

- სავალდებულოა „პერსონალურ მონაცემთა დაცვის შესახებ“ საქართველოს კანონის მოთხოვნების შესრულება;
- დაუშვებელია სტუდენტის/პროფესიული სტუდენტის წერილობითი თანხმობის გარეშე ან ინფორმაციის გასაჯაროების გამამართლებელი ობიექტური გარემოებების არარსებობის პირობებში სტუდენტის/პროფესიული სტუდენტის აკადემიური მოსწრების ან მის მიმართ გამოყენებული სანქციების შესახებ ინფორმაციის მესამე პირებისთვის გადაცემა;

- დაუშვებელია მესამე პირთა მიერ სტუდენტის/პროფესიული სტუდენტის იმ ნაშრომთან დაკავშირებული კომენტარების და შენიშვნების გასაჯაროება, რომელიც არ იყო წარდგენილი საჯარო დაცვაზე;
- დაუშვებელია სტუდენტის/პროფესიული სტუდენტის აკადემიური მოსწრების საჯარო განხილვა (გარდა შეფასების შედეგებთან ან სხვა აკადემიური საკითხებთან დაკავშირებული საჩივრის/აპელაციისა, რომელთა შესწავლა ობიექტურად მოითხოვს/ამართლებს ამგვარ განხილვას);
- დაუშვებელია სტუდენტის/პროფესიული სტუდენტის წერილობითი თანხმობის გარეშე პირადი ხასიათის ინფორმაციის გამოყენება ან ნებისმიერი სახით გასაჯაროება.

#### მუხლი 4. სტუდენტთა და პროფესიულ სტუდენტთა აკადემიური ეთიკის სტანდარტი

1. ბნსუ-ს სტუდენტის/პროფესიული სტუდენტის/პროფესიული სტუდენტის აკადემიური/სასწავლო საქმიანობა მოიცავს სავალდებულო საგანმანათლებლო (პროგრამით გათვალისწინებულ) საქმიანობას და სტუდენტის/პროფესიული სტუდენტის სურვილისამებრ - შემეცნებით/შემოქმედებით/კვლევით საქმიანობას. სტუდენტმა/პროფესიულმა სტუდენტმა უნდა დაიცვას ბნსუ-ს ეთიკის კოდექსის, აკადემიური ეთიკის კოდექსის, ბნსუ-ში მოქმედი სასწავლო პროცესის მარეგულირებელი დებულებების და ქცევის წესების მოთხოვნები და ისარგებლოს ბნსუ-ს ინფრასტრუქტურით (კომპიუტერული ტექნიკა, ბიბლიოთეკა და სხვა რესურსები) წინამდებარე შინაგანაწესში (მუხლი „ბნსუ-ს მატერიალურ-ტექნიკური რესურსით სარგებლობა“) მითითებული წესების დაცვით.

#### მუხლი 5. აკადემიური კეთილსინდისიერების სტანდარტი

1. აკადემიური, სამეცნიერო-კვლევითი და სხვ. საქმიანობისას ბნსუ-ს აკადემიური საზოგადოების წევრები ვალდებული არიან დაიცვან აკადემიური კეთილსინდისიერების სტანდარტები;
2. ბნსუ-ში პლაგიატად მიიჩნევა ინფორმაციის წყაროს ადეკვატური (სრული და ზუსტი) მითითების გარეშე საკუთარ ნაშრომში სხვისი იდეების, მონაცემების, ტექსტების, გამოსახულებების, გამონათქვამების ან სხვ. (შემდგომში - ნაშრომის ფრაგმენტები) გადმოტანა: უცვლელად ან ისეთი ცვლილებებით, რომელთა შედეგად უცვლელი რჩება გამოყენებული ნაშრომის ფრაგმენტის არსი;
3. ინფორმაციის/მონაცემების/სხვ. გაყალბებად, ფალსიფიცირებად, მანიპულირებად მიიჩნევა აკადემიური კეთილსინდისიერების სტანდარტის ისეთი დარღვევები, როგორცაა არარსებული ინფორმაციის/მონაცემების/წყაროების მითითება, საკუთარი შეხედულებისამებრ არსებული ინფორმაციის/მონაცემების შეცვლა, არასწორი წყაროს მითითება ან წყაროს აღწერისას მონაცემებით მანიპულირება და სხვ.;
4. ბნსუ-ში დაუშვებელია:
  - პლაგიატი (მათ შორის, თვითპლაგიატი), ინფორმაციის/მონაცემების/სხვ. გაყალბება, ფალსიფიცირება, მანიპულირება (მათ შორის: არარსებული ინფორმაციის/მონაცემების/წყაროების მითითება, საკუთარი შეხედულებისამებრ არსებული ინფორმაციის/ მონაცემების შეცვლა, არასწორი წყაროს მითითება ან წყაროს აღწერისას მონაცემებით მანიპულირება);
  - ნაშრომის შემსწავლელი კომისიის წევრის ფუნქციის ბოროტად გამოყენება და საკუთარი მიზნებისთვის კონკურსზე წარდგენილ ნაშრომებში არსებული ინფორმაციის, მონაცემების, კვლევის შედეგების, დასკვნებისა და სხვ. გამოყენება;
  - დაუსაბუთებლად თანაავტორობის მოთხოვნა;
  - კვლევის ჰიპოთეზის, დასკვნების და/ან სხვ. საწინააღმდეგოდ გამოტანილი/გამოთქმული დასკვნების/მოსაზრებების დამალვა;
  - ემპირიული კვლევის მეთოდის შესახებ განზრახ არასწორი ინფორმაციის წარდგენა;
  - სამეცნიერო საქმიანობაში კონკრეტული პირების მიერ ინტელექტუალური წვლილის დამალვა ან უარყოფა;
  - ხელნაწერების, ემპირიული კვლევის მონაცემების, ემპირიული მასალების ნიმუშების და სხვ. მოპარვა ან განზრახ დაზიანება/ განადგურება, დასკვნების, ანგარიშების და სხვ. გაყალბება;
  - პირადი ანტიპატიის, კონკურენციის ან სხვა მოტივით პირის/მისი ნაშრომის არაკორექტული, ტენდენციური კრიტიკა;
  - აკადემიური/სამეცნიერო საქმიანობისას სხვის ნაცვლად კვლევის/ნაშრომის/სხვ. შესრულება და/ან ამის საცანცვლოდ პირდაპირი ან ირიბი გზით რაიმე სახის ფინანსური ან მატერიალური სარგებლის ან/და მომსახურების მიღება;
  - ისეთი საქმიანობის ხელშეწყობა, რომლითაც ირღვევა აკადემიური კეთილსინდისიერების პრინციპები.
5. ბნსუ-ში სავალდებულოა:
  - სამეცნიერო კვლევით საქმიანობაში ჩართულმა პირმა დაიცვას აკადემიური კეთილსინდისიერების სტანდარტები;

- ნაშრომის ხელმძღვანელმა, რეცენზენტმა, ნაშრომის შემსწავლელი კომისიის წევრმა, სხვ. დაიცვა აკადემიური კეთილსინდისიერების სტანდარტები და სათანადოდ შეასრულოს დაკისრებული მოვალეობები;
- ნაშრომზე მუშაობის დაწყებამდე ხელმძღვანელმა სტუდენტს აუხსნას წყაროებთან მუშაობის, სხვისი ციტატების/მონაცემების/ გამოსახულებების/სხვ. გამოყენების და ნაშრომში ასახვის წესები, განუმარტოს აკადემიური კეთილსინდისიერების სტანდარტების არსი, შესრულების მნიშვნელობა და მათი დარღვევისთვის დაწესებული სანქციები.

## მუხლი 6. აკადემიური კეთილსინდისიერების სტანდარტის დაცვის ვალდებულება

### 1. ბნსუ-ში მოქმედებს შემდეგი წესი:

- აკადემიური კეთილსინდისიერების სტანდარტების ნებისმიერი დარღვევა მიიჩნევა აკადემიური ეთიკის კოდექსის დარღვევად, იწვევს დისციპლინურ წარმოებას და ბნსუ-ს შინაგანაწესით გათვალისწინებული დისციპლინური სანქციის დაკისრებას;
- პლაგიატის, ინფორმაციის გაყალბების, ფალსიფიცირების ან მანიპულირების ფაქტები უნდა იქნეს გამოვლენილი ნაშრომის გამოქვეყნების ან ნებისმიერი სხვა გზით ლეგალიზების მომენტამდე;
- პლაგიატის გამოვლენის მიზნით ნაშრომის შემსწავლელი პირ(ებ)ი იყენებენ სხვადასხვა რესურსს, მათ შორის - ელექტრონულს;
- პერსონალის სამეცნიერო სტატიებში, ნაშრომებში, მონოგრაფიებში, სახელმძღვანელოებში და სხვ. პლაგიატის, ინფორმაციის გაყალბების, ფალსიფიცირების ან მანიპულირების ფაქტები უნდა იყოს გამოვლენილი რეცენზენტების მიერ;
- სტუდენტის საბაკალავრო, სამაგისტრო/სხვა კვლევითი ნაშრომების შემთხვევაში პლაგიატის, ინფორმაციის/მონაცემების/სხვ. გაყალბების, ფალსიფიცირების ან მანიპულირების ფაქტების გამოვლენის პასუხისმგებლობა აკისრიათ ნაშრომის ხელმძღვანელს და რეცენზენტებს (საკურსო თეორიული ნაშრომის/ესე/სხვ. შემთხვევაში - ნაშრომის ხელმძღვანელს/პროგრამის კომპონენტის განმახორციელებელს);
- ნაშრომის ხელმძღვანელი ვალდებულია სტუდენტის ნაშრომზე მუშაობის დასრულებამდე პერიოდულად შეამოწმოს ნაშრომი პლაგიატის, ინფორმაციის/მონაცემების/სხვ. გაყალბების, ფალსიფიცირების ან მანიპულირების ფაქტების გამოვლენის მიზნით. რეცენზენტი ამოწმებს უკვე დასრულებულ (სარეცენზიოდ გადმოცემულ) ნაშრომს;
- საბაკალავრო, სამაგისტრო/სხვა კვლევითი ნაშრომის ხელმძღვანელი და რეცენზენტები, სამეცნიერო ნაშრომის/სახელმძღვანელოს/მეთოდური მასალის/სტატიის/სხვ. (შემდგომში - ნაშრომი) რეცენზენტები, აკადემიური კეთილსინდისიერების სტანდარტების დარღვევის შემსწავლელი კომისიის წევრები ადგენენ რამდენად სწორადაა ნაშრომში მითითებული წყაროები და გამოყენებული ციტატები/მონაცემები/სხვ., არსებობს თუ არა პლაგიატის, ინფორმაციის/მონაცემების/სხვ. გაყალბების, ფალსიფიცირების ან მანიპულირების ნიშნები;
- შესწავლის შედეგად ნაშრომის ხელმძღვანელის და რეცენზენტის დასკვნაში ნაშრომი შეიძლება დახასიათდეს შემდეგნაირად: 1) ნაშრომი მოიცავს მხოლოდ სწორად გამოყენებულ და მითითებულ ციტატებს/მონაცემებს/სხვ., წყაროები სრულად და ზუსტადაა მითითებული; 2) ციტატების/მონაცემების/სხვ. გამოყენებისას და წყაროების მითითებისას დაშვებულია ფორმალური ხასიათის დარღვევები, რომლებიც არ ატარებენ პლაგიატის, ინფორმაციის გაყალბების, ფალსიფიცირების ან მანიპულირების ნიშნებს. ამ შემთხვევაში ნაშრომის ავტორს ეძლევა ვადა (სამეცნიერო ნაშრომი/სახელმძღვანელო/სხვ. - 01 თვე, საბაკალავრო/სამაგისტრო/სხვ. ნაშრომი - 05 კალენდარული დღე) ხარვეზების გამოსასწორებლად, რის შემდეგ ხდება გასწორებული ხარვეზების შემოწმება; 3) ნაშრომში ფიქსირდება ინფორმაციის არაკორექტული გამოყენების შემთხვევები, რომლებიც ატარებენ პლაგიატის, ინფორმაციის გაყალბების, ფალსიფიცირების ან მანიპულირების ნიშნებს. ამ შემთხვევებში აუცილებელია ნაშრომის ავტორმა განმარტოს და დაასაბუთოს აღნიშნული ფაქტები. დასაბუთებული განმარტების არარსებობის შემთხვევაში მისი ქმედება განიხილება როგორც პლაგიატი, ინფორმაციის/მონაცემების/სხვ. გაყალბება, ფალსიფიცირება ან მანიპულირება და ნაშრომის ავტორი კარგავს განმეორებით იმავე ნაშრომის წარდგენის უფლებას;
- პლაგიატის, ინფორმაციის/მონაცემების/სხვ. გაყალბების, ფალსიფიცირების ან მანიპულირების ფაქტების გამოვლენის შემთხვევაში ნაშრომის ხელმძღვანელის/რეცენზენტის წერილობით დასკვნაში, ნაშრომის შემსწავლელი კომისიის შემთხვევაში - ოქმში უნდა იყოს მითითებული აკადემიური კეთილსინდისიერების სტანდარტის დარღვევის ფაქტის დასაბუთება. დასკვნა დაუყოვნებლივ უნდა ეცნობოს ნაშრომის ავტორს და გადაეცეს აკადემიური საბჭოს თავმჯდომარეს (ბნსუ-ს რექტორს);
- პირს, რომელიც არ ეთანხმება დასკვნაში დაფიქსირებულ პლაგიატის, ინფორმაციის/მონაცემების/სხვ.

გაყალბების, ფალსიფიცირების ან მანიპულირების ფაქტებს, უფლება აქვს დასკვნის გაცნობიდან 05 სამუშაო დღეში (ბნსუ-ში განცხადებების/საჩივრების წარდგენისთვის დადგენილი წესით) წერილობითი სააპელაციო განცხადებით მიმართოს აკადემიური საბჭოს თავმჯდომარეს (ბნსუ-ს რექტორს), ასევე, მას შეუძლია მოითხოვოს საკითხის განხილვაზე დასწრება და ზეპირად არგუმენტების წარდგენა (მოთხოვნა უნდა იყოს მითითებული სააპელაციო განცხადებაში); აპელაცია უნდა იყოს დასაბუთებული, მასში მკაფიოდ უნდა იყოს მითითებული რას აპროტესტებს ნაშრომის ავტორი, მისი არგუმენტები უნდა იყოს მკაფიოდ და ლაკონურად ჩამოყალიბებული. ზოგადი ხასიათის აპელაცია არ განიხილება, გადაწყვეტილება აპელაციის განუხილველად დატოვებაზე საბოლოოა და გასაჩივრებას არ ექვემდებარება. ნაშრომის ხელმძღვანელს, რეცენზენტს შეუძლია დასკვნის ჩაბარებისთანავე მიმართოს განცხადებით აკადემიური საბჭოს თავმჯდომარეს (ბნსუ-ს რექტორს) და მოითხოვოს საკითხის განხილვაში მონაწილეობა - საკუთარი მოსაზრებებისა და არგუმენტების ზეპირი წარდგენის შესაძლებლობა;

- საბაკალავრო, სამაგისტრო/სხვა კვლევით ნაშრომში, სამეცნიერო ნაშრომში/სახელმძღვანელოში/მეთოდურ მასალაში/სხვ. პლაგიატის, ინფორმაციის/მონაცემების/სხვ. გაყალბების, ფალსიფიცირების ან მანიპულირების ფაქტების დაფიქსირების შემთხვევაში აკადემიური საბჭოს თავმჯდომარე (ბნსუ-ს რექტორი) არაუმეტეს 02 სამუშაო დღეში იწვევს აკადემიური საბჭოს სხდომას. აკადემიური საბჭო განიხილავს დასკვნას და სააპელაციო განცხადებას (არსებობის შემთხვევაში), საჭიროების შემთხვევაში ქმნის აკადემიური კეთილსინდისიერების სტანდარტების დარღვევის შემსწავლელ კომისიას. აკადემიური საბჭო/საბჭოს მიერ შექმნილი კომისია უფლებამოსილია სხდომაზე მოიწვიოს დანტერესებული პირი, ნაშრომის ხელმძღვანელი, რეცენზენტი, დამოუკიდებელი ექსპერტები. აკადემიური საბჭო/აკადემიური საბჭოს მიერ შექმნილი კომისია 05 სამუშაო დღეში განიხილავს საკითხს და ამზადებს დასაბუთებულ დასკვნას, რომელიც არის საბოლოო. პლაგიატის, ინფორმაციის/მონაცემების/სხვ. გაყალბების, ფალსიფიცირების ან მანიპულირების ფაქტების დადასტურების შემთხვევაში აკადემიური საბჭო მიმართავს რექტორს პირის მიმართ დისციპლინური წარმოების დაწყების თაობაზე;
- პლაგიატის, ინფორმაციის/მონაცემების/სხვ. გაყალბების, ფალსიფიცირების ან მანიპულირების ფაქტების შემცველი ნაშრომის გამოცემის/სხვა ნებისმიერი გზით ლეგალიზების შემდგომ აკადემიური კეთილსინდისიერების სტანდარტების დარღვევის ფაქტების დადასტურების შემთხვევაში აკადემიური საბჭო მიმართავს ბნსუ-ს რექტორს ნაშრომის ავტორის და დაკისრებული მოვალეობების არასათანადოდ შესრულების გამო ნაშრომის ხელმძღვანელის, რეცენზენტის, ნაშრომის შემსწავლელი კომისიის წევრ(ებ)ის (ბნსუ-ს პერსონალის შემთხვევაში) მიმართ დისციპლინური წარმოების დაწყების მიზნით.

### მუხლი 7. აკადემიური კეთილსინდისიერების სტანდარტების დარღვევის შემსწავლელი კომისია

1. კომისიის შექმნის გადაწყვეტილება მიიღება იმ შემთხვევაში, თუ არსებობს: ა) ნაშრომის ხელმძღვანელის, რეცენზენტის ან სხვ. დასაბუთებული დასკვნა, დასაბუთებული ინფორმაცია/სხვ. აკადემიური კეთილსინდისიერების სტანდარტების დარღვევის შესახებ; ბ) ნაშრომის ავტორის განცხადება, რომლითაც პირი აპროტესტებს დასკვნაში/ინფორმაციაში/სხვ. მითითებულ ფაქტებს. განხილვას ექვემდებარება მომზადებული და ნებისმიერი გზით ლეგალიზებული ნაშრომები. კომისია არის დროებითი და იქმნება ნაშრომის სფეროს/მიმართულების მიხედვით. კომისიის შემადგენლობა (მათ შორის თავმჯდომარის და მდივნის ვინაობა) განისაზღვრება რექტორის ბრძანებით;
2. კომისიის წევრები არიან შესაბამის სფეროში კომპეტენტური აკადემიური საბჭოს წევრები და/ან ბნსუ-ს აკადემიური პერსონალი და/ან ბნსუ-ს მოწვეული პერსონალი და/ან კომისიის მუშაობაში მონაწილეობის მიზნით მოწვეული პირები (მითითებულ შემთხვევაში აუცილებელია დოქტორის აკადემიური ან მასთან გათანაბრებული სამეცნიერო ხარისხი). კომისიის წევრი ვერ იქნება ნაშრომის ავტორი/თანაავტორი/რედაქტორი/რეცენზენტი/სხვ., აკადემიური კეთილსინდისიერების სტანდარტების დარღვევის შესახებ დასკვნის შემდგენი/ინფორმაციის წარმდგენი ან სხვა დანტერესებული პირი (საქართველოს ადმინისტრაციული კოდექსით გათვალისწინებული ინტერესთა კონფლიქტის შემთხვევაში). კომისიის წევრებს გასაცნობად (ამონაბეჭდი სახით) გადაეცემათ ნაშრომი და თანდართული დოკუმენტები (დასკვნები, რეცენზიები, სხვ.). კომისიის წევრი ვალდებულია განაცხადოს ყველა იმ გარემოების თაობაზე, რომელმაც შეიძლება მას ხელი შეუშალოს საკითხის ობიექტურად განხილვაში და გადაწყვეტილების მიუკერძოებლად გამოტანაში, ასეთი გარემოების არსებობისას განაცხადოს თვითაცილების შესახებ;
3. კომისიის სხდომა არის დახურული. კომისია უფლებამოსილია მიიღოს გადაწყვეტილება, თუ განხილვას ესწრება კომისიის წევრთა 2/3. გადაწყვეტილება მიიღება სხდომაზე დამსწრე წევრთა ხმათა უმრავლესობით ღია კენჭისყრით, ხმების თანაბრად გაყოფის შემთხვევაში გადაწყვეტია კომისიის თავმჯდომარის პოზიცია;

4. კომისია უფლებამოსილია ინფორმაციის დაზუსტების და/ან კონსულტაციის მიზნით სხდომაზე მოიწვიოს დაინტერესებული პირი, ნაშრომის ხელმძღვანელი, რეცენზენტი, დამოუკიდებელი ექსპერტები, სხვა საგანმანათლებლო დაწესებულებების და დარგობრივი ორგანიზაციების წარმომადგენლები და სხვ., რომლებიც არ მონაწილეობენ გადაწყვეტილების მიღებაში;

3. კომისიის მუშაობა და გადაწყვეტილება აისახება სხდომის ოქმში, რომელშიც მიეთითება: კომისიის დასახელება; სხდომის თარიღი და ადგილი; სხდომის თავმჯდომარის, სხდომის მდივნის, წევრების ვინაობა; სხდომაზე მოწვეულ/დამსწრე პირთა სია (არსებობის შემთხვევაში); დღის წესრიგი; გამოთქმული მოსაზრებები/კენჭისყრის შედეგები; მიღებული გადაწყვეტილება. ოქმს ხელს აწერს კომისიის თავმჯდომარე და მდივანი. კომისიის მუშაობის შედეგი აისახება შესაბამის დასკვნაში (მიეთითება კომისიის სხდომის ოქმში), რომელიც გადაეცემა რექტორს, შემდეგ კი განსახილველად და გადაწყვეტილების მისაღებად - აკადემიურ საბჭოს.